

TE RANGA-A-RUANUKU PORAKA.

Piira Nama 125.—A Hiki Natanahira me etahi atu ; he whakauru i etahi ingoa tangata hou e toru ki te ota ; a i te mea kaore he kai-whakahe, kua mahia a kua apititia atu e matou he rarangi e whaka-atu ana i o ratou ingoa, timata i te Nama 564 tae noa ki te 566, me o ratou hea, ki te whairu o nga puka-puka mo tenei poraka ; a ka tohutohu atu nei matou ko aua ingoa me aua hea me hono atu ki te ota.

Piira Nama 123.—A Tiopira Tamaikoha ; he whakauru i etahi tangata hou e toru ki te ota ; kaore he kai-whakahe mo tenei tono ; no reira kua apititia atu e matou nga ingoa o aua tangata, timata i te Nama 567 tae noa ki te 569, me o ratou hea, ki te rarangi e tapiri nei ki te whairu hei hononga atu ki te ota ; a ka tohutohu atu nei matou ko aua ingoa me aua hea me hono atu ki te ota.

Tetahi wahi ano o tenei piira e tono ana ko nga hea o Tiopira Tamaikoha, Nama 410 i roto i te ota, me Ngahirata Tiopira, Nama 497 i te ota, me whakanuku kia tae ki te rua tekau hea mo te mea kotahi o raua ; a i te mea kaore he kai-whakahe, no reira kua apititia atu e matou aua hea whakanuku e tonoa mai nei ki te taha o o raua ingoa i roto i te ota ; a ka tohutohu atu nei matou me whakanuku pera ake o raua hea.

Piira Nama 124.—A Puihi Marutawhao me etahi atu. I unuhia tenei piira e nga kai-piira ; a i te mea kaore he kai-whakahe ka tohutohu atu nei matou me whakakore atu taua piira.

Piira Nama 126.—A Mehaka Tokopounamu me etahi atu ; e tono ana kia whakaurua etahi tangata hou e toru tekau ma whitu ki te ota mo tenei whenua. I whakahengia tenei keehi e Numia Kereru, a i ata whakahaerea i ata uiuia aua keehi e rua e tenei Komihana a mutu noa.

Kua whiriwhiria e matou nga korero, a ki ta matou whakaaro kua kore e taea e Mehaka te whakau i nga take o tana keehi. Ko te take tupuna i whakaaraha e nga kai-piira e whakahengia ana, a ko a ratou korero mo nga noho kaore i marama, haunga anake te noho a Hami i tona wa i moe ai ia i a Katau a ka noho tahi ki a ia, me te noho a tona tuahine a Repora, whaea o Mehaka nei, i tona wa i moe ai i a Hukanui. Ki ta matou titiro ko nga whakahe i whakaaraha e te keehi whakahe ki tenei piira kaore rawa e taea te karo atu, a ko taua tono whakauru me hinga, me te piira me whakakore atu, a e pera ana hoki ta matou nei tohutohu atu.

Piira Nama 127.—A Rawiri Kokau me etahi atu. I te kahititanga o tenei piira i panuitia mo Tarapounamu-Matawhero Poraka, engari i runga i te tono mai a Rawiri Kokau mo te taha ki nga kai-piira katoa, whakaaetia ana e matou kia whakatikatikaina, ara kia unuhia mai ki waho o nga piira mo Tarapounamu-Matawhero Poraka a kia whakahaeretia hei keehi e pa ana mo Te Ranga-a-Ruanuku Poraka.

I uiuia a i whakahaeretia e matou tenei piira a mutu noa, me te keehi whakahe ano hoki i whakaturia e Numia Kereru. I roto i te whakahaerenga o tenei uiuinga ka tonoa mai ko etahi pa e rua, ko Oteahu, me Okuao—i kiia e nga kai-piira he pa maioro kei runga i te whenua e tu ana, a i tino whakahengia nei aua pa e te keehi whakahe—me tiki me titiro i runga i te whenua. No reira i whakaaetia etahi tangata tokorua e nga keehi e pakanga ana kia raua, kotahi no tetahi kotahi no tetahi o aua keehi e tautotohe nei, a whakahaua ana e tenei Komihana hei haere ki runga i te whenua titiro ai a ka whakaatu a tinana mai ki a matou ina hoki mai raua.

Kua ata whiriwhiria e matou nga korero i homai e aua keehi tautotohe e rua nei ; kua tirohia te whenua, a ko aua pa i korerotia nei e nga kai-piira kaore rawa i kitea, kaore hoki he papa whare i kitea i aua wahi i kiia ra e ratou he pa.

Ki ta matou whakaaro kua kore e taea e nga kai-piira te whakau i ta ratou keehi whakahe mo te whakatau a te Komihana tuatahi ; a ka tohutohu atu nei matou me whakakore atu ta ratou piira a me whakapumau te whakatau a te Komihana tuatahi mo te rohe wahanga i waenganui o Te Ranga-a-Ruanuku Poraka me Tarapounamu-Matawhero Poraka.

Ko nga tangata e whitu e mau ake nei nga ingoa i raro he tangata i kowhiria e nga tangata nona te whenua i roto i a ratou hei mema mo te Komiti Hapu mo tenei poraka, a i whakaaetia ano hoki e nga tangata katoa o taua whenua i tae mai ki te aroaro o tenei Komihana i te nohoanga ki Whakatane i te 8 o nga ra o Maehe, 1907.

1. Numia te Ruakariata.
2. Te Pouwhare te Roau.
3. Te Whetu te Paerata.
4. Mika te Tawhao.

5. Hiki Natanahira.
6. Te Pairi Tuterangi.
7. Hori Aterea.

GILBERT MAIR (Tawa).
D. F. G. BARCLAY (Pakere).
PARATENE NGATA.

TARAPOUNAMU-MATAWHERO PORAKA.

Piira Nama 138.—A Ngahiwi te Kapiti ; e tono ana kia whakanukuhia ake tona paanga kia noho ki te rua tekau hea. No te roanga ka whakariteritea i te aroaro o tenei Komihana me whakanuku ake te paanga o te kai-piira o Ngahiwi te Kapiti, Nama 881 i roto i te ota, kia tae ki te tekau ma rima hea ; a ka tohutohu atu nei matou me pera te whakanukuhanga ake o ona hea.

Piira Nama 131 me 139.—A Te Hira Tangohau me etahi atu ; he whakauru i etahi ingoa tangata hou e rua ki te ota, kia rima nga hea mo te mea kotahi o raua ; a i te mea kaore he kai-whakahe kua apititia atu e matou o raua ingoa, Nama 884 me 885, ki te ota, mo aua hea i tonoa mai nei ; a ka tohutohu atu nei matou me hono atu ki te ota.